



UPA 2015/17

22/04-2015

Michael Rosing

Uummasuutillit tunisassiornikkut, ingerlatsinikkut malitsigisaanillu uummasuutit pissarsissutaanerat annertusarniarlugu pissutsit atugaat pillugit pitsaangorsaanissaq pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Suka K. Frederiksen, Siumut)

(Siullermeenera)

Demokraatini isumaqatigaarput una oqallinneq pingaaruteqartoq. Kisianni aamma isumaqarpugut oqallinneq annermik misigissutsinik tunngaveqartoq paasissutissanik tunngaveqarani. Oqallinneq utaqqissunneqarsimasariaqaraluarpoq nunalerineq pillugu siunnersuisoqatigiit isumaliutissiissumminnik naammassinninnissaata tungaanut. Naallu isumaliutissiissut arlaleriarluta ujartortarsimagaluaripput malunnarpoq takkukkallarunnangitsoq, taamaattumik oqalliseqataaginnassaagut.

Siunnersuuteqartup oqallinnermut atatillugu saqqummiussinermi allappoq siunertarineqartoq uumasut toqutassat amerlisarneqarnissaat peqataanik naasoqarneq sumiiffinni amerlasuuni ajornartorsiutaagaluartoq. Apeqquserparput tunisassiornerup annertusarnissaa ivigassaqarniarnerup ajornarseruttornerani.

Kangitsinni nuna eqqaamiorput Island qiviarutsigu takusinnaavarput tassani nunap nunarput amerlasuutigut assigigaa taamaallaat Kalaallit Nunaata kujataanit qorsuutiginani. Immaqa tamannarpiaq Kalaallit Nunaata danskisut Grønlandimik atserneqarsimaneranut pissutaasimasinnaavoq. Islandip takutippaa kinguaariippassuarni ivigaqarfiit atorluarneqarsimasut ivigaqarfiit pinngortitap neriineranit anorimillu nungunnissaasa tungaanut naggataatigut ujaraannangupjaarlugit.

Ivigaqassuseq aalisarnerlu uumassusilerineq eqqarsaatigalugu assigiinnangajapput. Ivigaqarfiit atorpallaaraanni soorlu aalisakkanik assagiarsunnillu ukiuni qulikkaani arlalinni



aalisarpallaarsimanertut, taava naggataatigut ivigaqarfiit nungullartarput sivisoorsuarmik iluarsisassaajunnaarlutik.

Oqaatiginiakkatta pingaarnersaa uumassuseqarnermut aningaasaqarnermullu tunngavoq. Kalaallit ivingaqarfii naggorissaasersungaannigitsut tunngavigalugit neqit tunisassiarineqarsinnaasut annerpaaffissaqarput. Nuna atorluarnerorusukkaanni naggorissaatit annertunerit atortariaqarput. Ataatsimut isigalugu neqi tunisassiarineqartoq akitsoriartuinnartarpoq neqip tunisassiarineqartup akia naggorissaammut tikisinneqartartumut naleqqiullugu akilersinnaajunnaarnissaata tungaanut. Naatsorsuutigaarput naatsorsuineq suli takusimannigisarput tamanna nunalerineq pillugu isumalioqatigiisitap ilanngussimassagaa.

Siunnersuuteqartup aamma kissaatigaa aasakkut uumasut ivigartorfissaannut assartorneqartassasut aamma pingaarnersiuisoqartassasoq ataqatigiissaarisoqartarlunilu uumasut sorliit nunaminertanut sorlernut ivigartoriartortassanersut eqqarsaatigalugu. Taanna pillugu taamaallaat oqassaagut, isumaqaratta pisortat nunalerisut namminersortut uumasuutaannik assartuisussaannigitsut. Aamma isumaqarpugut niuernerup nammineq aalajangertariaqaraa uumasut sorliit nunaminertani sorlerniissanersut. Tassunga atatillugu pisortat suliassaraat pitsaasunik sinaakkusiinissap qularnaarnissaa sinnerilu nunalerisunut isumagitillugu.

Kisiannili sinaakkutissat eqqartornerat iluatsillugu oqaatigissavarput isumaqatigigatsigu malittarisassiortoqassasoq, qularnaarumallugu ivigartorfiit atorneqarpallaannginnissaat taamatullu malittarisassiortoqassasoq uumasut isumannaatsuunissaat qularnaarumallugu.

Taamatut oqaaseqarluta qujavugut oqallinnermut soqutiginartumut aamma qilanaarpugut oqallinnerup nangeqqinnissaanut paasissutissat pisariaqartitagut pigineqalerpata tassa nunalerineq pillugu isumalioqatigiisitap nalunaarutaa utaqqisarput saqqummiunneqarsimalerpat.